

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U TEŠNJU
Broj: 39 0 K 080141 26 K
Tešanj, 04.06.2026. godine

U IME FEDERACIJE BIH!

Općinski sud u Tešnju, sudija Bekrić Hidajeta, uz sudjelovanje zapisničara Alisa Šabanović, u krivičnom predmetu optuženog B. I. zvn. „A.“, iz K. broj 172. O. T., zbog krivičnog djela “Posjedovanje i omogućavanje uživanja opojnih droga” iz člana 239. stav 3. Krivičnog Zakona Federacije Bosne i Hercegovine, povodom optužnice Kantonalnog tužilaštva ZE-DO kantona Zenica broj T04 0 KT 0062866 26 od 17.02.2026. godine, nakon održanog pretresa za izricanje krivičnopravne sankcije, u prisutnosti tužitelja Kantonalnog tužilaštva ZE-DO kantona Ahmetlić Amre i optuženog, dana 04.06.2026. godine donio je sljedeću:

P R E S U D U

Optuženi

B. I., zvan "A.", sin I. i majke J., djevojačko prezime majke A., rođen u D. gdje je i nastanjen u mjestu K. broj 172, općina T., rođen 13.06.1986. godine, po narodnosti Bošnjak, državljanin Bosne i Hercegovine, JMBG: ..., po zanimanju automehaničar, nezaposlen, neoženjen, pismen, sa završenom srednjom stručnom spremom, nije služio vojsku, lošeg imovnog stanja, osuđivan zbog istog krivičnog djela, ne vodi se postupak za drugo krivično djelo,

Kriv je

što je:

dana 24.02.2025. godine, oko 07,50 sati u mjestu C., općina T., suprotno odredbama člana 4. stav 1. u vezi sa članom 19. i 20. Zakona o sprečavanju i suzbijanju zloupotrebe opojnih droga („Službeni glasnik BiH”, broj: 8/06), iako je znao da je posjedovanje opojne droge zakonom zabranjeno, to je i htio, pa je neovlašteno posjedovao jedno pvc prozirno pakovanje sa sadržajem bijele praškaste materije neto mase 7,340 grama za koju materiju je vještačenjem utvrđeno da se radi o opojnoj drogi "Amfetamin" koja se, kao takva, nalazi na Listi opojnih droga, psihotropnih tvari, biljaka iz kojih se može dobiti opojna droga i prekursora („Službeni glasnik BiH" broj: 8/06, 103/08 i 51/11) i to u Tabeli II (Tvari i biljke pod strogim nadzorom) pod rednim brojem 1. Popisa psihotropnih tvari, a koju opojnu drogu je dobrovoljno predao policijskim službenicima PS Tešanj prilikom kontrole vozila marke "Fiat Bravo", reg. oznaka "...", kojim je upravljao M. A., a u kojem

vozilu se nalazio na mjestu suvozača, o čemu mu je izdata potvrda o privremenom oduzimanju predmeta,

dakle, neovlašteno posjedovao opojnu drogu,

čime bi učinio krivično djelo Posjedovanje i omogućavanje uživanja opojnih droga iz člana 239. stav 3. Krivičnog zakona Federacije Bosne i Hercegovine, pa se na osnovu istih zkonstskih odredaba i odredaba člana 43 i 49 Krivičnog Zakona Federacije Bosne i Hercegovine

OSUĐUJE NA KAZNU ZATVORA U TRAJAJNJU OD 3 (TRI) MJESECA

U smislu odredaba člana 78. stav 1. i 239. stav 4. Krivičnog zakona Federacije Bosne i Hercegovine optuženom se izriče mjera sigurnosna oduzimanja predmeta, i privremeno oduzeta opojna droga „Amfetamin“ neto mase 7,340 grama trajno se oduzima a količina preostala nakon vještačenja 7,310 grama ima se uništiti, te se naređuje Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekusora.

Optuženi se oslobađa od plaćanja troškova krivičnog postupka.

O b r a z l o ž e n j e

Kantonalno tužilaštvo ZE-DO kantona Zenica optužnicom broj T04 0 KT 0062866 26 od 17.02.2026. godine optužilo je B. I., zbog krivičnog djela “Posjedovanje i omogućavanje uživanja opojnih droga” iz člana 239. stav 3. Krivičnog Zakona Federacije Bosne i Hercegovine,(u daljem tekstu KZ F BiH) počinjenog na način, vrijeme i mjesto kako je to pobliže opisano u optužnici, temeljeći optužbu na dokazima koji su predloženi u optužnici.

Sudija za prethodno saslušanje ovog suda potvrdio je nevedenu optužnicu dana 19.02.2026. godine.

Na ročištu za izjašnjenje o krivnji optuženi, nakon što je u smislu odredaba člana 13. ZKP-a, poučen o svojim pravima, izjavio je da je izvršio radnje na način i vrijeme kako je to opisano u dispozitivu ove optužnice, da je izvršio predmetno krivično djelo i da priznaje krivnju.

Nakon razmatranja izjave o priznanju krivnje uvjerenje suda je da je do priznanja krivnje došlo dobrovoljno, sa razumijevanjem da je optuženi svjestan svih posljedica i obaveza koje proističu iz priznanja krivnje te da postoji dovoljno dokaza o krivnji optuženog, pa je sud i prihvatio izjavu o priznanju krivnje.

Sud je izvršio uvid u materijalne dokaze prikupljene tokom istrage, i to: Zapisnik o uviđaju Ministarstva unutrašnjih poslova Zeničko-dobojskog kantona (u daljem tekstu "MUP ZDK"), Uprava policije, Policijske uprave IV, Policijska stanica Tešanj (u daljem tekstu "PS Tešanj"), broj: 08-02-11/1-34/25 od 24.02.2025. godine, Potvrda o privremenom oduzimanju predmeta PS Tešanj, broj: 08-02-11/1-36-28/25 od 24.02.2025. godine, Zapisnik PS Tešanj o izvršenoj radnji privremenog oduzimanja predmeta i popisu privremeno oduzetih predmeta, broj: 08-02-11/1-07/24 od 24.02.2025. godine, Odobrenje KT ZDK, broj: T04 0 KTA 0062866 25 od 06.03.2025. godine, za otvaranje i pregled privremeno oduzetih predmeta sa naredbom za hemijsko vještačenje, Zapisnik o otvaranju i pregledu privremeno oduzetih predmeta i dokumentacije, PS Tešanj, broj: 08-02-11/1-1-31-1/25 od 17.03.2025. godine sa dostavnicom, Naredba KT ZDK za hemijsko vještačenje, broj: T04 0 KTA 0062866 25 od 06.03.2025. godine, Naredba PU IV za deponovanje predmeta, broj: 08-02-11/1-1-31/25 od 11.06.2025. godine, Izvod iz kaznene evidencije PU Doboj za lice za osumnjičenog B. I. broj 14-02/1-234.1-281/26 dana 25.02.2026 godine, Fotodokumentacija PS Tešanj, broj: 34/25 od 17.03.2025. godine (datum izrade 24.02.2025. godine) - otvaranje privremeno oduzetih predmeta. Zapisnik PS Tešanj o ispitivanju osumnjičenog B. I., broj: 08-02-11/1-17-182/25 od 24.02.2025. godine, Nalaz i mišljenje FUP-a, Centra za forenziku, Odsjeka za hemijsko-toksikološka ispitivanja, vještačenja i istraživanja, broj: 11-18-18/2-03-5-669 od 28.05.2025. godine, Standardizirani policijski izvještaj PS Tešanj, broj: F-04-21-25-00300 od 24.02.2025. godine pa je sud cijeneći izvedene dokaze pojedinačno i u njihovoj međusobnoj vezi utvrdio da je optuženi počinio radnje opisane u dispozitivu ove presude, odnosno da je neovlašteno posjedovao praškastu materiju neto mase 7,340 grama, za koju materiju je utvrđeno vještačenjem da sadrži psihoaktivnu komponentu „amfetamin“, te predstavlja opojnu drogu „speed“, a optuženi je bio svjestan da je zakonom zabranjeno posjedovanje opojne droge, ali je htio i držao kod sebe za vlastite potrebe.

Uvjerenje suda je da je do priznanja krivnje došlo sa razumjevanjem, te da je optuženi svjestan svih posljedica i obaveza koje proističu iz priznanja krivnje, te da postoji dovoljno dokaza o krivnji optuženog, pa je sud i prihvatio priznanje optuženog.

Budući da je odredbom člana 3. tačka 1. Zakona o sprečavanju i suzbijanju zloupotrebe opojnih droga (Sl. Glasnik BiH br. 8 od 07.02.2006. godine) propisano da je opojna droga svaka tvar prirodnog ili umjetnog porijekla koja je uvrštena u popis opojnih droga u skladu s međunarodnim konvencijama o nadzoru nad opojnim drogama ili na temelju odluke nadležnih tijela u Bosni i Hercegovini, a stavom 2 istog člana da je psihotropna tvar svaka tvar prirodnog ili umjetnog porijekla koja je uvrštena u listu psihotropnih tvari u skladu s međunarodnim konvencijama o kontroli nad opojnim drogama ili na osnovu odluke nadležnog organa u Bosni i Hercegovini, te odredbom člana 4. istog Zakona propisane opće zabrane, a članom 19. i 20. istog Zakona da je uzgoj, proizvodnja, promet i posjedovanje opojnih droga i psihotropnih supstanci dozvoljeno samo u medicinske, veterinarske i naučne svrhe, pa pošto je „amfetamin“ listom opojnih droga, psihotropnih tvari i biljaka iz kojih se može dobiti opojna droga i prekusora (Službeni glasnik BiH broj 8/06 od 07.02.2006. godine) u tabeli II popisa psihotropnih tvari pod rednim brojem 1 proglašena za psihotropnu tvar, to je optuženi i postupao suprotno odredbama člana 4. u vezi sa članom 20. Zakona o sprečavanju i suzbijanju zloupotrebe opojnih droga.

Kako krivično djelo „Posjedovanje i omogućavanje uživanja opojnih droga“ iz člana 239. stav 3. KZ F BiH čini onaj ko neovlašteno posjeduje opojnu drogu, a uračunljivost optuženog nije ničim dovedena u pitanje, to se u radnjama optuženog stiču sva bitna obilježja krivičnog djela „Posjedovanje i omogućavanje uživanja opojnih droga“ iz člana 239. stav 3. KZ F BiH, pa kako je optuženi bio svjestan svog djela i htio njegovo izvršenje, to je sud optuženog oglasio krivim i osudio kao u izreci ove presude.

Prilikom odlučivanja o vrsti i visini krivično pravne sankcije, sud je cijenio na strani optuženog sve okolnosti koje su od značaja za odmjeravanje kazne. Od olakšavajućih okolnosti sud je našao da optuženi priznaje izvršenje djela koje mu se stavlja na teret, da je nezaposlen, lošeg materijalnog i zdravstvenog stanja, a od otežavajućih okolnosti da je osuđivan više puta za istu vrstu krivičnih djela i druga krivična djela, da su mu do sada više puta izricane uvjetne osude, i kazne zatvora pa je optuženog i osudio na kaznu zatvora u trajanju od 3 mjeseca, jer je uvjerenje suda da se svrha kažnjavanja može postići samo bezuvjetnom kaznom zatvora obzirom da se radi o specijalnom povratniku u vršenju krivičnih djela.

U smislu odredaba člana 78. KZ F BiH i 239. stav 4. KZ F BiH, sud je izrekao mjeru sigurnosti oduzimanja opojne droge „amfetamin“ neto težine 7,340 grama, a količina preostala nakon vještačenja i to 7,310 grama ima uništiti, te se nalaže Komisiji za uništenje opojne droge formirane pri Vijeću Ministara BiH da odmah po prijemu naloga za izvršenje mjere sigurnosti a najdalje u roku od mjesec dana od PU IV PS Tešanj oduzme navedenu opojnu drogu preostalu nakon izvršenog vještačenja, te istu uništi u skladu sa Pravilnikom o čuvanju i uništenju oduzete opojne droge, psihotropnih tvari, biljaka iz kojih se može dobiti opojna droga i prekusora.

U smislu odredaba člana 202. stav 4. ZKP-a sud je optuženog oslobodio od plaćanja troškova postupka, jer se radi o nezaposlenoj osobi.

PRAVNA POUKA:

Protiv ove presude dozvoljena je žalba
Kantonalnomo sudu u Zenici u roku
od 15 dana od dana prijema presude.

SUDIJA

Bekrić Hidajeta